

PORI MA KOROSÍ NANIN BANTA UVAMAN AMEIN BOMPON MINO

(Korosi)

Korosi Vompon Ma Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Pori ino.

Uvarein orana ino.

AD sikisti-tu (62) fin mi Efesásí nanin banta vái vompon má Firimonini vompon má uváden mi manafin dan baren oren mino.

Ma vompon ma uvantein baru ino.

Romú barurá karavusií uran báken karavusi namun pintéi uvanten mino.

Ma vompon ma uvaman amikhein kéká ino.

Esiá barafin bain baru Korosaé ma vain monó nanin banta ma Efesasíke monó doran banta kéká ano ma o avían mantakhein kayofin nen ten iniyan mino. Korosaé barurá Pori ída oman monó dorarí ukhen ne sen onten mino.

Nái ana vará ma vompon uvanten nafino.

Korosí barurá Pori ída orikharen pasen avábá bá aronaí in má bompon mi uvamádan orikhnen mino. Kampun sakhanampa vanta kéká ano ma Yutan kayoi feyante avúavá bá inká Kiriki kékái avúavá bá ma maman manafiní iyain kéká amaan baya siamiyáken inká Ti yarafenu ano intesá uren ná ma vara uvaren ná inká Ti yarafenun má ará manafiní e váke vá inká ákona e vá amúkono ma siyain mano Karaisini ovaránen erin maman títosí iyain nan mi sian amá ukhen mino. Máan ma ein manon Yisasi iyé ban nafi mai ven nan tian amá iyáken inká ena anampin ma fura kama vaya varen varen orin banta uno sen Pori veyan nan tian amá ukhen mino.

Porini Susu Vaya Ino

1 ¹Yisas Karaisini vaya varen orin bantaí ino siren ma Tiyaarafenu ano vei anunurá ma aní ukhein banta séi Porin má inká teti sifá tiváe Timotin má anon ma vompon uvaman, ²Korosí barurá ma vákeya ma Tiyaarafenu monó tiyaona nanin bantan ameruna seti Sifóe Tiyaarafenui sarisari vá ará kusin má ano siretin má banten mino.

Porini Amúkin Má Inká Tiyaarafenu Ma Susu Siantan Má Baya Ino

³Ena ena yamú ma siretin nan timúkiyá maé tetisi Bafan Yisas Karaisin Afóe Tiyaarafenui susu sianté iyá uno. ⁴Mai fara vara seyo, Yisas Karaisintá ma mumunan iyákeya ma Tiyaarafenui vanasi ma avábá uantiyaona van mi setí ankan iniré uno. ⁵^bMai fara va máan tiya vaono. Tiyaarafenu ano ma kama yaná inarufá iyáantádan ma vain mai fura vayan iniyákeya mairái Yisas Karaisintá mumunan iyai veni vanasi ará amiya ono. ⁶Tiretí ankan ma ineona mai kama vaya ano inka minó akhempá orera iyan maen inká mai ma siretin ará baéda ma Tiyaarafenui fura yaná bá ume nanin banta ma sarisari in má ma afová eonaí en mi minó akhen páke nanin banta ará baédan mi mumunan iyan mino.

⁷Teti ma sinunu iyaruna sifá tiváe Epafrasi ano ma ma kama vaya siamein mai véi maen Karaisintá mumunan iyain doran bantan báken tetin má manafin doriyain mi van tetin too varen mai yorarién mino. ⁸Ena nanin banta van ma anunuin avúavá ma Kantá Aunan mano siretin amikha ma mai avúavá ma ena kéká aní iyaona van mi véi setin tisimen mino.

⁹^dMáan tukhein nan mi siretí ankani vaya ma ineruna yamú kákéi siretí ankan aya urantiya moékentá béin afová iyasín Kantá Aunan mano kama ineine vá afova vá amino van Tiyaarafenu timúkuan amiyá tiféuno. ¹⁰Máan tiyá tiféku mae siretí ankan mano Bafani vanasi ano ma funtákein aasá ma oriyainí esin mai van tiretin moéken anunu ino van muno. Máan intin tiretini ara ara yorani nan aran kamaen afoká inten mino. Máan esin Tiyaarafenui afova ano mo kákaní inten mino.

¹¹^eMáan tiyantín Tiyaarafenu ano vei moékan ákonafó tiretí ankan ákona amintiya mantaan ákona uve ara ara uman bare oriya mae mai uman kayo ma kípán nain damu san bempáké báké ave in nono. Máan tukhare maeya amusin mái ¹²^fAfóen tusu siantan nono. Mai ma Tiyaarafenui kakhantá báken ma kantasí ukhein nanin banta ma ameno van Tiyaarafenu ano ma iyáantan bain danasinta van mai siretin mái

^a 1:3-4 Efe 1:15-16 ^b 1:5-6 Efe 1:13; 1Pi 1:4 ^c 1:7-8 Kor 4:12; Frm 23 ^d 1:9 Efe 1:16-17
^e 1:11 Efe 1:19; 3:16 ^f 1:12 Efe 1:11, 18

varan nono sikhen mino. ¹³^gMai fara vara seyo, fefá kákan títípa aránaói varé é tifékun mi véi mai finte o siviren meren mi mai ma véi moéken anunu ukhein iyamponi yafisin aúpin kaí bá tiféuno. ¹⁴^hMáan turen Tiyaarafenu ano veni narefói ume fintena setin miyaní uren evaránen tivíden ume ampisintáken mino.

Yisas Karaisini Kákan Bí Pákena Ma Pori Sikhein Baya Ino

¹⁵ⁱTetí ankan ída kanaí é Tiyaarafenu oná tifanté umpo ven Anin Yisasi ano anan ben má manaí ukhen maen beni esé iyampon báken béi anan Tiyaarafenu ano ma uvantein danasintará o ánoní ukhen mino. ¹⁶Mai fara vara seyo, Tiyaarafenu ano Karaisin pintéi uaren mi inarufá ma vain danasinta vá inká ma varará ma vain danasinta vá uvanten mino. Mai ma yákó bain danasinta vá aúpa ma vain danasinta vá ara ara ákona vain enisori kayo vá inká ákona Aunan kayo vá ákona yaná kayo vá ma ma varará bain mai ven ninaen tiren uvádákan mi véi yafíken mino. ¹⁷Minó daná ída afoká ukhan maen béi fefá baréin pasen mai yanasinta ano véintái o súpá ukhen mino.

¹⁸^kMáan tukhein nan mi véin mumunan nanin bantai ánon bákan mai nanin banta ano ventá o súpá uven mana vukhafai ukhen mino. Béi anon purin pinté an uanten orun mantaven minó danáká o ánoní uven mai yanasintará dafíken mino. ¹⁹^lMai fara vara seyo, Tiyaarafenu ano Yisasimpin bano van amusin uaren mi véimpin e víkakhen mino. ²⁰^mBíkavin inarufá ma vain danasinta vá barará ma vain má ano Yisasín má manafin kasen bano van mi véin tiantan daa unkamádantá dorun puren mino. Púbin beni nare ma vanaein manon ben ma namuroí uantiyá é tiferuna kéká bá manafin kasen ban avúavá maman dákó en mino.

²¹ⁿPefá Tiyaarafenu ádé ída vákei siretíi ineinefin béin namuroí uantiyákeya namu ineine iyaya namu avúavasí iyare ono. ²²^oMáan tiyare ompo Yisas Karaisi ma yaa unkamádantá e furein manon mai ma Tiyaarafenu vá ma namuroí iyá eona maman manafin kasen ban avúavá dákó en mino. Béi ma máan tein manon tiretí ankan maman kantasí uren mi aviren Tiyaarafenu avorá morantiya o mantan nono. ²³Máan tukhein nará mantaan ákona uve vá pura yanákasá mumunan iya vano. Máan tiyaré esin mana yaná ano e yarifaádantiya mai ma inire ma mumunan iyá eona kama vaya me ampinona van muno. Minó akhempá ena kéká ano kama vaya siamiyákan mai yorará ino van Tiyaarafenu anon téi Porin aní ukhen mino.

Pori Ma Monó Nanin Bantai Yorará Iyain Baya Ino

²⁴Tiretí ankan ma aya iyáké uman bariyaruna van timusin mi iyá uno. Para vara seyo, Yisas Karaisin aui monó nanin banta vákan mi vetin naro

^g 1:13 Ruk 22:53; Efe 2:2 ^h 1:14 Efe 1:7 ⁱ 1:15 Yon 1:18; 2Ko 4:4 ^j 1:17 Yon 1:1; 8:58

^k 1:18 Apo 26:23; Efe 1:22-23; Rev 1:5 ^l 1:19 Kor 2:9 ^m 1:20 Efe 1:10 ⁿ 1:21 Rom 5:10; Efe 2:12 ^o 1:22 Rom 5:10; Efe 5:27

siren ma Yisasi uman baren mo áin ma fara vain uman aya uan kípantó uno. ²⁵^pTiyarafenu anon téin aní uren tivían kaí monó nanin bantai yoran banta váké aya iyá uno. Máan turen mi sireti ena anan nanin bantafin minó beni vaya máa sian dákó ino siren mai yoran timikhen mino. ²⁶^qTiyarafenu ano fefái ma vaya aúpá kain ban eriyen baren mifo saréan kantasí ukhein nanin banta avorái véi sian dákó en mino. ²⁷Para vara seyo, Tiyarafenu ano vei anunurái mai ma aúpá kain baré ein bayan bei vanasi avorá tian dákó uran mi mai vaya ano ena anan nanin banta ma mumunan iyain kayo aya iyan mino. Mai aúpá baya maen Yisasi ano siretimpin bantiya ventá mumunan iyá esin e aviren morantiya vei kakhampin o vasin kama yanasinta amintiya varan nono.

²⁸Máan tukhein nan mi seti ma oreruna akhempá Karaisini kama vayan minó nanin bantan tiamiyá uno. Tiyarafenu ano ma simein ineine vá afova vá ánain dakhaféi ákona vayafó tiamiyá uno. Mai fara vauno funtákein nanin banta máa ana aviré Tiyarafenun mo ameno van muno. ²⁹^rMáan tukhein nan mi Yisas Karaisi ano ma simiyain ákona fói kákan dorarí iyá uno.

Yisas Karaisin Pin Ma Minó Kama Yanasinta Vá Kama Afova Vá Bain Baya Ino

2 ¹Siretin má Raodisiá barurá bá ma mumunan nanin banta vain má inká téin ma ída sontein kéká bá ma aya ono van ma ákona yorarí iyaruna van afová ono van mi séi inikhé uno. ²Téi ma mai yorarí iyaruna ana maen mai siretí ankan ará ákona uantékuya Tiyarafenui vanasi ará amire manafin kase vano van muno. Máan téku kama ineine varesin mai ano siretí ankani mumunan ákona uantantiya Tiyarafenui aúpá baya afová ono van muno. Mai aúpá bayai ana Yisas Karaisi ino. ³^sMoní kain namun ma moní bíkakhen bain an mi yen ara ara afova vá aúpá ineine vá ano Yisas Karaisimpin bíkakhen ban mino.

⁴^tManáa vanta ano ase vayafó tiretí ankan mákáden aviran nan mi ma vaya siamiyá uno. ⁵^uPara vara seyo, séi ída siretí ankan má bá umpo se sú bá ineine vá ano siretin má ban mino. Tireti ma funtáke váke ma Yisas Karaisintá ákonae mumunan iyaona vaya ma iniré timusin é uno.

Yisasin Má Tupá Uven Ma Kusin Má Para Van Oriyan Ban Aunan Má Baran Baya Ino

⁶Yisas Karaisin inka maman ei Bafaní ukha ompo ventá o súpá uve vá béin oo yaiya vano. ⁷^vDaa ana ano ma varafin arú dan aravuvín ma mantaan ákona uven anu orun darifaren ma ampameiní eya va Yisasintá

^p 1:25 Efe 3:2, 7-8 ^q 1:26 Rom 16:25-26; Efe 3:5, 9 ^r 1:29 Efe 3:7, 20; Fir 4:13

^s 2:3 1Ko 1:24, 30 ^t 2:4 Rom 16:18 ^u 2:5 1Ko 5:3 ^v 2:7 Efe 3:17

o súpá uan ákona uve vá mai ma siamé tiferuna vaya kayorá ákona e mumunan iyáke vá Tiyarafenun moéke susu siantano.

⁸Manáa vanta kéká ano eriven maen kampun baya vá beni ana ída vain baya vápó me mákádantiya vetin dakhafin nompo yafían ná ákona ono. Máan banta kayo ano vetí anafu aráoni ineine vá namu aunan kayo ma ayompin báken ma ma vara yafíkein kéká báí ineine ánain manan dakhafiyán mifo Karaisini ineine ánain ída yakhafiyán mino.

⁹“Mai fara vara seyo, Yisas Karaisi ma varará bukhafa mamaren ma setin tan davin maen Tiyarafenui Aunan mano véimpin e víken mino. ¹⁰“E víkavin namu aunan kayoi ákona yanasintará béi o ánoní ukhein pase véimpin ma o asótú uvesin maen Tiyarafenui Aunan mano véin pinté uaren tiretimpin e víkanten mino.

¹¹“Tiretí ankan ma ventá o súpá eona anon puraseya au ma khaveiní ukha ono. Mai maen dante vukhafarasa ifo aú bukhafará ino. Yisas Karaisi ano ve avúavápói ume vukhafa yo síkaan karúdara va ompo varará banta ano va máan tura va vaono. Ída ino. ¹²“Mai ma monó non pereona anon Yisas Karaisin má ma masí einí ukhareyan inká mai ma Tiyarafenu ano ma Yisasin Karaisin orun avían mantein ákonará ma mumunan eona anon Karaisin má evaráne orun mantakha ono.

¹³“Namu avúavápin pefá bákeyai feyante anunu ánain bákuriyan nan mai avúavá ano siretin aruan púkaren mifo Tiyarafenu anon tiretin avían Yisas Karaisintá túpá uren mi furin pintena evaránen avían manten mino. Máan turen mi setisi ume yo arútinten mino. ¹⁴“Man baya ano setin kótisintáden maen tetinti ume maman dákó urái man baya aránaópá baré é tifékun mi Tiyarafenu ano mai ma kó tisintiyá ein baya minó do maman karúdaren man bayai ákona máden asuse uren Yisas Karaisini yaa unkamádantá mo khauren aríkan kípakhen mino. ¹⁵Máan ma ein manon namu aunan kayoi ákona maman bararasí uren kípaanten mino. Yisas Karaisini yaa unkamádantá ma Tiyarafenu ano vei ákona aní ein manon betin maman bara finí uren mi vanasi avorá ayave amikhen mino.

Tireti Ma Yisas Karaisin Má Púkeona Vaya Ino

¹⁶“Máan tukhein nan mi siretí ankan ída vá áesin ná tinafu siráoni man bayafin ma yunan má non má ma nan na fi áa avíkan damú kayo ma ída yafisin nara fi áa auyen biyon ma me khain damú ma amusin in nara fi áa Sabati yamusara fi ma are ukhan nain póké mana vanta ano siretin daimino. ¹⁷“Para vara seyo, mai man baya kayo ano ínaimpá ma yákó inain daná amamanon mi varé íkan Yisas Karaisi anon pura sen mai yaná ban mino. ¹⁸Barará bantai ineine ánain ma yakhafiyain banta kéká

^w 2:9 Yon 1:14, 16 ^x 2:10 Efe 1:21-22 ^y 2:11 Rom 2:29 ^z 2:12 Rom 6:4 ^a 2:13 Efe 2:1, 4-5 ^b 2:14 Efe 2:14-16; 1Pi 2:24 ^c 2:16 Rom 14:1-13 ^d 2:17 Ibu 8:5

ída vá áesin ná tīretí ineine máden asuse uren ná kama miyan baran aa yasirano. Inká tetí ankan kain onté umpo enisori kayo rasá monó tiyaya mumunan ono ma sin nain banta kéká ída vá áesin ná tīretí ineine máden asuse ino. Máan banta kayo ano vetiyan manan minó afova manté uno siren be aví daní é iyan mino. ¹⁹ Máan té iyan mifo setisi ánon Yisas Karaisi ma vain má ída o asótú ukhen mino. Para vara seyo, setí ankan béimpin mi o asótú uvé tifékun mi vei minó bukhafafin béi yunan amiran maen ákona varé iyan mino. Tiyarafenu fintena anan ákona mamaréi mumunampin inoré iyá tiféuno.

²⁰ Tīretí ankan pefái Yisas Karaisin má púare orun mantaven nan mi véi ano siretin maman auyení ukhen mifo fara é tiré ma vara ráke vantai man baya ano ma máa sikhein ánain bákuriyá ba rafono. ²¹ “Ída vá maifó dorarí ono, ída vá nano, ída vá aruvono ma sikhein man baya kayo van mi siyá uno.” ²² Máan man baya kayo ma vain mai varará bantai ineinen báken mai vayafó ma yorarí ure nan maen ainen o kípé iyan mino. ²³ Mai man baya kayo ano ará mantarantiya ákona e monó tiyáke kama ineine vá afova vái monópin bare sire maeya e amo sire yunan auriya moéke monó tiyáke mumunan inono. Máan tin nompó mai man baya ánain ma yakhafin mano ída umefin ma orin aasá iyaranten mino.

Kantasí Ma Ukhen Ban Man Baya Ino

3 ¹ Tiyarafenu ano Yisas Karaisin má inka orun avían mantara va ompo inaru fáke yanasintará ana vá kakhábe orono. Para vara seyo, mai varurái Yisasi ano vei kin karáká Tiyarafenui ayan kuompá kumanten mino. ² Inaru fáke yana san mana vá ineine iyáke ída vá ma vara ráke yanasintará inin kaono. ³ Mai fara vara seyo, Yisasin mái sīretí ankan pūben nan ben mái sīretí aunan mano Tiyarafenufin aúpá ban mino. ⁴ Yisasi maen tīretí ankani aunan mi vain Tiyarafenui ákona kakhān má ma e unen dákó inain damúi sīretin má dere yákó inono.

Tīretí Aúpin Ma Vain Namu Avúavasá Aruan Purono

⁵ Máan tukhein nará ma vara ráke avúavá ma sīretí ankan aúpin bain ná aruan purono. Kampun ayarafenu rá ma monó té iyaona mai famúku avúavá safi fain avúavá safi ará manta avúavá safi namu avúavá safi inká ena ina yana san ma aranan avúavá safin ban mino. ⁶ Mai fara vara seyo, Tiyarafenui aran naná ano mai avúavá ma variyain nanin banta amaninái erinten mino. ⁷ Pefá tīretin má deren mai ma namu avúavá bariyain kéká bá avunté uveya mai avúavá bariyare ono. ⁸ Máan tiya

^c 2:19 Efe 2:21; 4:16 ^f 2:20-21 Kar 4:3, 9; 1Ti 4:3 ^g 2:22 Mat 15:9 ^h 3:1 Mak 12:36; 16:19; Efe 1:20 ⁱ 3:2 Mat 6:33 ^j 3:5-6 Rom 6:6, 11; Efe 4:19; 5:3-6 ^k 3:8 Efe 4:25-29; 5:4

ompo mai ma aranan uren ma ena ará namu uantáden ma oyampá baya sin avúavá bá inká namu vaya ma sin avúavá bá ina vá taréa ifasá tifano. ⁹Tiretí ankan ída vá kampun bayafó monó nanin banta van e sian more mere ono. Mai fara vara seyo, fefái mai avúava sinta me ampikha rono. ¹⁰Peyante avúavá inka me ampireya auyení ukha rono. Tiya rafenu ano siretí ankan maman auyení uren ena ena yamú kama afova kayon amiyákayai véin má manái ukha rono. ¹¹Máan tukháí auyení ma ukhé tiferuna nanin banta ano manái ukhé tiféuno. Maifin ída Kriki vanta fi Yutan banta fi au khakhein nafi ída au khakhein nafi áa ena vaya siyain nafi áa ena vara fáke vanta fi áa miyan ída van doran banta fi inká para van banta fi van mino. Mai fara vara seyo, Yisasi veyáká anan báken minó nanin bantafin ban mino.

Ena Ma Avábá In Baya Ino

¹²Ti ya rafenu ano sireti maman kantasí uren tesina e siren anunu ukhen mino. Máan tukhein nará ma avúava sinta vá bararo. Ena nanin banta van arunan uantáde kama iyáke vá inká ará bararasí ureya vempáké kama e kuse vá bano. ¹³Bempáké manafin bákeya vá ben ma ará namu uantan maran ma ukhá inona vasá tirun noe sin maran iyáke vá inká tiretin ma namu uantákáin naini ume vá ampiantano. Bafan mano ma siretíí ume ampiantákeini éya vá ena nanin bantai ume ampiantano. ¹⁴Máan tiyáke mae ena nanin banta vá avábá ono. Para vara seyo, ena ma avábá in manon ara ara avúavá esantakhen mai anon minó nanin banta o fáke e fáke uádan manafin ban mino. ¹⁵Yisasin pinté ma eriyain ará kusin ná áesin tiretin auká dafisino. Ti ya rafenu ano ma siretin araren ma ará kusin amira ma mana vukhafaí ukhaona vará ena ena yamusá tusu siantano.

¹⁶Yisas Karaisini vaya vá áesin tiretí ankampin moéken báken ná mai ano siretin kama ineine amintiya vá ben ayain maran iyáke afova amin maran ná ono. Máan tiyákeya siretí ankan aukáke sá Ti ya rafenun tusu siantiya vá í bompon pintena í bá monó í bá inká Aunan mano ma amiyain í basá dano. ¹⁷Máan tiyáke ara ara yorariín po safi áa vayafo safi ma varanona mai Bafan Yisasin avíkasá barano. Máan tiyaya ven avíkasá Ti ya rafenun tusu siantano.

Monópin Ma Vain Nanin Bantai Man Baya Ino

¹⁸Anasi kéka soe, siretí avafuná aránaópasá baro. Mai avúavái Bafan avorá puntáken mino. ¹⁹Inká banta kéka soe, siretí aná ona vara anunu iyákeya ída vá betí ankan ará namu uantano.

¹ 3:9 Efe 4:22, 25 ^m 3:10 Efe 4:24 ⁿ 3:11 Kar 3:28 ^o 3:12 1Pi 2:9 ^p 3:13 Efe 4:2, 32
^q 3:14 Rom 13:8-10 ^r 3:15 1Ko 12:27; Efe 4:4; Fir 4:7 ^s 3:16 Efe 5:19 ^t 3:17 1Ko 10:31;
Efe 5:20 ^u 3:18 Efe 5:22 ^v 3:19 Efe 5:25

²⁰ ^wIyamporinta oe, anóe afóe ma sin nain baya ánain ná dakhaforo. Para vara seyo, mai avúavá anon Bafan amusin amé iyan mino.

²¹ ^xTireti afóeyan noe, ída vá iyamporinta arápiní esin ná anan maran ino. Máan tesin maen kaumpan uren kama avúavá ampinten mino.

²² ^yTireti miyan ída van doran banta kayo oe, funtáde vá ei ayafa ano ma sin nain baya ánain mana vá dakhafono. Ída vá timo sino van muno sireya véin avorá ana kama yorari iyákeya Bafan nan periya vá dorari ono. ²³Intéa yoran ná dorante fo mai Bafani yoran mi yoriyá umpo ída varará bantai yoran doriyá uno seya ovare me iniyáke amusin masá dorano. ²⁴Tiretí ankan afovasá ono. Bafan mano fefái siretí miyan útaren iyáantan ban mino. Mai ma yoriyaona yoran kayoi ayafa maen mai Bafan Yisasi ino. ²⁵ ^zMáan tukhein nan mi mana vanta ano ma aaú uranten maen mai miyan beyan mi varanten mifo aronará ma áuantiyain avúavá ída Bafampin ban mino.

4 ¹ ^aTireti ayafa kéka soe, siretí miyan ída van doran banta kayo rasá kama yafisirí ono. Para vara seyo, siretí ankan afová ukhe nan tiretí Kákan inarufái van mino.

Amúkí Pákana Van Ma Sikhein Baya Ino

² ^bTiretí ankan ma amúkono van inten mae yafían ákona ukhe vá tusu siyáke vá amúkono. ³ ^cAmú ma khiyáke setin nan ída vá áun nono. Amúkuan Ti yarafenu amesin ná aaí usintantirá mai ma kama vaya ma aúpá baini ana sian dákó ono. Mai ma aúpá bain baya mai Yisas Karaisin báká mai vaya ma sian dákó eruna van mi karavusií urá bá uno. ⁴Téi nan puntáden kama vaya sian dákó ino van muno sireya vá Ti yarafenun amúkuan ameno. ⁵ ^dÍda ma monópin bain nanin banta aúban ma nókeya kama inin má ana vá noya vetin ayaesin ná Yisasintá mumunan ino. ⁶ ^eEna ena yamú ma vaya sinonafin ase vain kama vaya ana siyá esin ma ena kéká ano ma éin má bayaí inti mae anona funtákein baya siamin nono.

Pori Ma Kípan Baya Sein Mino

⁷ ^fTéi má yoriyaruna fákena vaya Tikikasi anon tiaminten mino. Béi maen tetin tifá tiváen báken Bafanin ákona yoran bantan ban mi setin má manafin doriyan mino. ⁸ ^gMáan tiyain mi vái siretin ará ákona

^w 3:20 Efe 6:1 ^x 3:21 Efe 6:4 ^y 3:22 Efe 6:5-8 ^z 3:25 Rom 2:11 ^a 4:1 Efe 6:9

^b 4:2 Efe 6:18; Fir 4:6 ^c 4:3 Rom 15:30; Efe 6:19 ^d 4:5 Efe 5:15-16 ^e 4:6 Efe 4:29; 1Pi 3:15 ^f 4:7 Efe 6:21 ^g 4:8 Efe 6:22

uantian inká teti intesá é barafu mai vaya kayo vá dere siamino van mi véin tiantékun oren mino. ^{9h}Tiretin pinte vanta Onesimasi maen mumunan tifá tiváen bain Tikikusin má tiantékun oren maen intéa yanasá dákó iyan nafi mai vaya mo siamintiya afová inono.

¹⁰ⁱAristakusi ma sen má karavusifin bain banta ano vei amusin baya yákan inká Banabasin afóna Maki yere amusin baya siáden mino. Makin ma sireti vaonafá orintin ma kama ure aviran nona vaya fefái siretin tiamikhé uno. ¹¹Yisasin nan ma Yastasin ne siyain banta ano yere amusin baya sen mino. Yutan kayo finté mai kéká ano anan ten má báken doriyá timusin iyá Tiyarafenui yafisin nan tian dákó iyá tiféuno.

^{12j}Tiretíi varu ráke vanta Epafarasi maen Yisas Karaisini yoran bantan báken béi yeren amusin baya yan oren mino. Tiyarafenu ano siretin aya intiya mantaan ákona uveya veni anunu afová ure maifin karakhe vano van mi véi ena ena yamú amúkuantiyan ban mino. ¹³Beni yoran afová ukhé paséi ma vaya sian dákó iyá uno. Tiretin má Raodisiá baru ráke kéká bá inká Ieraporisi varu ráke kéká bá aya ono van mi ákona yoraríi iyan mino.

¹⁴Ayofan banta ma minó ano simusin iyá tiferuna vanta Rukun má inká Demasin má ano yere amusin baya yan oren mino. ¹⁵Tenti simusin baya vá Raodisiá baru rákena mumunan tiyofi sifá tiváeyan má inká Nimfan má ben amá ma o átaru uven monó tiyain mumunan kéká basá tiameno.

¹⁶Tiretí ankan ma ma vompon dankádeya ma inirante mae Raodisiáke nanin banta amesin ná betíyan dere yankáden iniyanti vá inká betin ma amenuna vompon ná tireti yere yankáde ineno.

^{17k}Máan tiyáke vá inká Akipusin tiamesin ná Bafan mano ma amikhein doran ná daffan ákona uven ná dóan kípano.

^{18l}Téi Pori ano seyantái ma vompon uvaman tiretí ankan amé uno. Téi karavusifin pa vákéi ma vompon uvaré umpo vá téin nará inisintaro.

Tiyarafenui sarisari ano siretin má banten mino.

^h 4:9 Frm 10-12 ⁱ 4:10 Apo 12:12; 13:13; 15:37-39; 2Ti 4:11 ^j 4:12-14 Kor 1:7; Frm 23-24
^k 4:17 Frm 2 ^l 4:18 1Ko 16:21